

A V A N T - P R O P O S .

la façon de vivre qu'on y tient, iugeront si leur humeur sera compatible avec celle des habitants de ces lieux ; si les estrangers principalement ceux de sa nation, y peuvent acquerir quelque honneur qui est le principal but de la noblesse, & pour acheuer, afin de se mettre en estime ayant to ut considéré se disposeront de l'ogne main à forcer leur naturel s'il est rebours, à se despoüiller de leurs passions, à supporter toutes incommoditez, & à s'accommoder à tout pour se pousser bien auant.

Les simples soldats qui veulent releuer leur naissance & leur fortune par les preuues de leur valeur ont presque mesme chose à considérer; & pour cet effet oyant le bruit de quelque leuée de gens pour aller aux pays que l'on dispute, ils pourront s'instruire auant qu'ils y deslogent de ce qu'ils y doiuent rencontrer, & par ce moyen se resoudront avec plus d'assurance au voyage, ne se trouueront surpris de la nouveauté, lors qu'ils auront appris la verité deuant que partir, & la voyant la tiendront comme chose de si longuement pratiquée, & vieille parmi eux.

Ceux qui veulent s'introduire au maniemement des affaires d'Estat, tireront souuent d'icy des maximes, qu'ils sçauront si bien mesnager, quoy qu'elles soyent empruntées de la coustume de quelque peuple, qu'elles semblerot estre leurs, & les feront paroistre inuictifs, iudicieux, & capables de donner tousiours quelque sain aduis pour le bien de leur Republique.

L'Aduocat qui semble auoir seulement besoin des loix, ordonnances, & coustumes, qui sont en cours au lieu de sa demeure, pourra par le moyen de ce liure, mesler parmi son plaidoyer quelque coustume ou loy estrangere en faueur de sa partie, & la faisant remarquer aux Iuges, mesmes aux plus incurieux, les conuincra peut estre tellement à y auoir esgard, & à la considérer, que bien souuent cela luy donnera gain de cause, ou du moins en tout euenement gain de reputation.

Et ne doit on pas tenir pour heureux le marchand qui rencontrera ces discours, puis qu'il peut sçauoir en bien peu de temps les lieux où son trafic se doit adresser, & s'instruire suffisamment des pays où il peut trouuer ce qu'il cherche, ou vendre ce qu'il possède, & qu'il a moyen d'apprendre de quelle sorte les choses s'achètent ou se vendent en ces lieux, si c'est par troc, & bi-gage, ou à prix d'argent, & par quelle voye il faut gagner les vendeurs qui sont barbares, ou se garantir des ruses des plus subtils, qui sçauent desguiser, ou empirer les marchandises ?

Quant aux artisans & gens de mestier ils ont icy nouuelles des Prouinces qui se trouuent auoir besoin de leur art: & pour ce il ne leur est guere mal aisé de se resoudre de changer de sejour, lors qu'ils reconnoissent avec assurance que le changement leur doit estre utile, & qu'ils feront bien mieux leur profit ailleurs qu'aux endroits où ils se sont premierement establis.

Pour conclure en peu de mots, il n'y a sorte de personne qui ne puisse tirer quelque profit de ce liure, qui comprend, comme i'ay ja dit, une bonne